



Sa limba sarda: raighina de unu pòpulu e de sa cultura sua.

A printzipios de s'annu 2026 torrant a cumintzare sas atividades de sos Isportellos de Limba Sarda cun su progetu "Creschimus in Limba", chi at retzidu s'aprovazione e su finanziamentu de sa Regione Autònoma de Sardigna pro mèdiu de sa L.482/99 e sa L.R. 22/2018 gràtzias a su bandu TuLis, annualidade 2025-2027. Su progetu presentadu dae su Comune de Padru, comente ente cabu-fila at a interessare s'unione subra comunale chi aunit sos comunes de Alà, Belchidda, Uddusò, Monte, Òschiri e apuntu Padru. Comente amus nadu, su progetu est istadu presentadu dae su Comune de Padru, in fatu a s'aprovazione de totus sos àteros sindigos de su territòriu chi ant retzidu cun piàghere sa proposta de su Sindigu de Padru Antonello Idini. Tocat de nàrrere chi in custos annos sos sindigos e sas amministrazione de custos 6 comunes sunt semper istados atentos a dare valore a sa Limba Sarda, ponzende aficu in propostas e traballos de promotzione e de amparu.

Su progetu at a èssere contivizadu dae s'Istituto Chircas e bidet in prima linia operadores chi ant s'obietivu de diventare unu puntu de riferimentu linguìsticu pro aziende, assòtzios, tzitadinos, amministraziones pùblicas, ma mescamente pro sas istituzione scolàsticas e pro sos giòvanos.

Dende importu a sa risposta retzida in custos annos dae sas istituzione scolàsticas, s'isportellu linguìsticu cheret dare vida a unu progetu chi contivizet sos ligàmenes intre a sas diversas generatziones, gràtzias a atividades educative e culturales, promovende un'iscàmbiu de connoschèntzias e de esperièntzias tra giòvanos e mannos, arricchende s'ambiente sotziale e culturale de totu su territòriu. Sas atividades ponent in mesu fintzas sas biblioteecas e sas ludotecas, logos in ue si podent contare istòrias e esperièntzias, fraighende unu patrimoniu comune de ammentos e de connoschèntzias, cun laboratòrios pro zente de ogni edade.

De importu mannu at a èssere s'afortimentu de sa comunicatzione esterna pro fàghere a manera chi totu sa comunidade potat leare parte a su progetu, gràtzias a collaboratziones cun emittentes e cuotidianos pro interessare sa zente pius manna e impitende in manera istratègica sos "social" pro intrare a pare cun sa parte pius giòvana e dinàmica de sa comunidade. Custu progetu non cheret ebbia afortiare sos ligàmenes intre a sas generatziones, ma diat chèrrere fraigare una comunidade pius unida e abbista chi tenzat contu de sas raighinas culturales suas, formende un'ambiente in ue ogni persone, giòvana o manna, si potat intèndere avalorada e parte ativa de sa sotziedade.

S'operadore de isportellu linguìsticu de s'Istituto Chircas, Francesco Pitta est a disponimentu pro tradutziones, consulèntzias, dimandas e assistèntzia pro cale si siat traballu, progetu, chistione o curiosidade subra a sa limba e a sa cultura sarda e at a èssere disponibile in sas dies e in sos oràrios chi s'aghint:

Lunis dae sas **09:00** a sas **11:00** in sa Biblioteca Comunale Giovanna Scanu, opuru pro telefono a sos nùmeros 079724027 o +393662474725

Chie at bisonzu de preguntare carchi cosa a sos operadores podet finas iscrìere una mail a s'indirizzu monteacutuinlimba@gmail.com o imbiare unu messàgiu a sa pàgina Facebook "*Isportellos de Limba Sarda – Istituto Chircas*".

A parte sas atividades de s'isportellu, ant a èssere attivados fintzas sos cursos de formatzione de Limba Sarda (unu pro onzi comune interessadu) chi ant a bènnere pubblitzados cun atenzione in antis de ogni s'ingulu incomintzu ufiziale. Sos cursos sunt abertos a totu sa popolazione, dende sa possibilitade a totus sos interessados e a totus sos appassionati de crèschere e meorare sas cumpetèntzias linguìsticas issoro, siat pro cantu pertocat sas modalidades de iscritura e siat pro cantu pertocat sa possibilitade de meorare sa manera de faeddare ma finas pro arricchire su vocabulàriu issoro.

Pro cantu pertocat sas atividades culturales e de promotzione linguistica, bida sa resèssida in su progetu passadu, si pensat chi siat cosa bona cussa de sighire cun su Cuncursu de Poesia destinadu a sos Istitutos Iscolàsticos de su Monte Acuto. Sighende su caminu de s'annu passadu, fintzas ocannu s'at a chircare de pònnere in mesu de sas atividades non solu sos istudentes ma fintzas sas famìlias issoro, chi gràtzias a intervistas, contos e ammentos los ant a agiuare pro su fràigu de sas poesias acumpanze-nde-los a intro de temas istòricos o culturales pro mèdiu de una visione noa e moderna.

Duncas, 24 meses de atividades chi ant a àere in comune sa limba Sarda e chi ant a bìdere in su ruolu de protagonista sas comunidades interessadas dae su progetu.

Traballu a cura de s' Isportellu linguisticu de Alà
Progetu "Creschimus in Limba" – annualidade 2025/2027 – Bandu TuLis
Finanziadu dae sa RAS cun sa L. 482/99 e sa L.R 22/2018